

劉兆祐博士主編
中國史學叢書三編

皇

明

疏

鈔

(上)

臺灣學生書局 印行

劉兆祐博士主編
中國史學叢書三編

皇明

疏鈔
(上)

臺灣學生書局 印行

皇明疏鈔卷之六十

征討一

進平南獻俘露布

張輔

臣張輔上言伏以天討有罪聿興吊伐之師武功告成爰舉獻俘之禮渠魁盡獲海嶠肅清蓋剋惡必鋤其本根而絕患寧存乎萌孽安南逆賊黎季犛更姓名胡一元及子黎滄更姓名胡奎者僻居炎徼負固海隅豺狼之殘孽蛇虺之遺毒戕賊國主潛移陳氏之宗桃荼毒生民數犯朝廷之邊境攻圍詔使侵暴隣邦僭稱大虞竊紀年號酷刑威衆人懷孥戮之憂橫斂剥民家被掊剋之害踣寃動地無辜籲天

聖恩嘗許其自新狂豎怙終而不改擠遏天朝之

使賊殺故主之孫亮其三苗舜法豈容於原宥罪浮
反側漢兵必事於剪除臣等恭奉制書總率師旅

鷹鷂鷂先雲氣而度斗南貔虎熊羆挾風威而踰
嶺表屢破重關之險飛渡長江遂拔多邦之城殲夷
群醜乃乘破竹之勢分逐竄蒿之夷東都立平西都
亟下餘孽如螻螳之聚迅掃於盤灘困牧賊黨猶燭
火之然撲滅於嚕江仙侶市廛安堵郡邑嚮風士民
上書陳其罪惡者動以千計土人效順願同追剿者
何啻萬人乃督舟師進逼膠水逐鯨鯢於海口困
兇於柙中暫爾偷生須臾延命因駐我師而設備

致彼賊以就誅狂悖猶欲鴟張醜類仍懷豕突傳賊衆引兵駕象以來侵憤激諸軍鳴劔抵掌而往捕臣彬臣旭戒行既遠都督柳升驚報倏來賊復入於黃江船悉來於閩海遣偽將朝射仁鑑等於今年三月三十日犯鹹子關臣輔遂用弩弓躍馬督陳以麾兵調驃騎將軍吳旺劉塔出遊擊將軍林帖木兒神機將軍張勝丁能朱貴橫海將軍王玉都指揮黃義指揮李敬等領精兵而直前急擊登岸之勁賊都督僉事柳升黃中鷹揚將軍江浩徐泰都指揮徐正等率舟師而力戰奮剿游水之逆徒殲其群兇斃其首將瀘水盡赤長江屍壅而血腥殺氣騰空終日雲昏

而霧慘臣晟率都指揮柳宗等領馬步官軍水陸夾
攻矢鏑雨注而莫我敢遏銃砲雷錙而所向無前大
肆剪屠餘燼潰散臣彬臣旭聞報繼至臣輔率驃騎
將軍朱榮等乘勝追襲由魯江至於黃江賊酋敗其
徒黨葉槩奔逃獲海艦及其戰艦直抵悶海聞賊首
等輕舟復竄海濱遂洗滌脅從綏懷降附臣晟等率
其都指揮俞讓等亦由魯江直至龍王海口獲到戰
守船隻釋其拘繫人民臣輔等以賊巢既傾兇徒盡
散遂振旅於膠水復陳師於交州誓殄賊以寧邊當
奮身而勵衆議留臣旭備禦黃江等處臣輔臣彬領
馬步官軍倍道兼進直窮海陬追擒賊首臣輔仍調

柳升橫海將軍魯隣等并土人知府莫邃等臣晟調
指揮李節并土人知府阮太等各領戰艦由水路窮
追四月二十三日師過清花府磊江賊衆猶舉蠆尾
而致毒欲逞螳臂以當輪遂分調前隊官軍剿殺戈
船邀擊而夾岸奔走矛戟爭馳而望風披靡殘夷敗
衄士氣倍增二十九日舟師至典史門涇鵲淺晴久
水涸賊衆捐舟而先遁我軍進擊而莫前俄然雲作
沛然雨下水漲數尺信川祗之效靈船過千艘豈人
力之能致不待渡河而冰合奚勞拜井而泉流有開
必先慶罪人之斯得惟動不應仰聖德之格天師
進演州府茶龍縣探知首賊逋于人安府深江狐疑

猶豫方謀三窟以庇身雷勵風飛不可一日而縱賊臣輔率都指揮陳懷巫凱等由土田縣舉厥江東臣彬率都指揮俞讓盧旺俞其指揮王英等舉厥江西各從陸路掩襲游魂震懾焚舟欲竄於新平餘黨離披投仗來降於海口臣輔復調黃中神機將軍程寬張勝丁能驃騎將軍劉賽因不花遊擊將軍朱廣王恕等遁海而追躬率大軍馳躡至日南州柳升等魯麟舟師先於奇羅海口敗殺賊徒奪其戰舸五月十一日其所領永定等衛軍士王柴胡等七人生擒賊首黎季犛黃中所領指揮陳欽率交州右衛軍人李保等十人於海口山中擒獲賊男黎澄十二日莫

下頭目武如卿等五人於盎海畔高望山生擒賊首
黎滄及其男黎柄臣晟臣彬尋跡追襲亦至日南
據阮太等報初十日於奇羅海口擒獲賊弟季貌并
姪黎源咎等其胡杜范六才阮彥光段擊等賊之爪
距亦既就擒陳日昭阮飛卿阮謹杜滿等賊之心膂
悉皆降附過師枕席之上簞食來迎救民水火之中
室家相慶寬宥迫脅招撫流離奉宣恩命獲遂更
生掃魑魅於炎荒息妖氛於瘴海臣輔等稽諸載籍
安南本古交州漢唐僅能羈縻宋元猶被侵侮僭竊
跳梁徂於故習雖加兵而致討終叛服而不常矧茲
逆族震此生靈覆載不容人神共憤今父子兄弟皆

綁縛於轅門宗族偽官咸生擒於麾下自謂蠻烟瘴
雨之僻處歷代兵威所不能加孰知 聖德神功之
齊天六合全封而莫敢敵勘定之速邁三年之克鬼
方俘獲而還陋六月之伐獫狁雪前代之遺恨解邦
民之倒懸將士歡呼知天心之助順蠻夷舞忭信人
道之惡盈是皆 聖畧淵深明見萬里之外 天威
烜赫坐收三捷之功數百種雕題馱舌之民咸躋壽
域幾千里魚鹽繁衍之地盡入輿圖復隆古之封疆
布中華之禮制通前所平州府四十八處縣一百八
十六處戶三百一十二萬五千九百所獲象一百一
十二馬四百二十牛三萬五千七百五十船八千八

百六十五其所俘斬獲級軍資器仗別奏條上臣等
今將生擒到賊首偽大虞國上皇黎季犛等獻俘
闕下其餘解送擒獲并降附偽官別具奏聞臣等
曾無汗血之勞獲伸敵愾之志皆遵成算得效微勤
平定南夷克清大憝獻俘而告廟社仰答神靈盛
醢以賜蠻夷用昭天憲聿新萬年之治化永樂四海
之清寧臣無任歡呼慶忭之至

議處四川土官事宜疏

余子俊

巡撫四川都御史孫仁題稱松潘東南二路番夷自
洪武初年克服以來於各番開設安撫司長官司衙
門擇其豪酋授以安撫長官俾各管束所屬無非所

以撫之也而未嘗不剿焉及於松潘茂州各置一衛
疊溪小河各置一所東南二路各立關堡積蓄糧儲
屯駐軍馬有總兵叅將之官以揭其綱有提督巡守
之職以張其目無非所以勦之也而未嘗不撫焉蓋
於其服而不叛也不可
不勦於其叛而不服也不可
不勦必撫勦兼行恩威並著制馭之策盡矣但蠢茲
醜類生齒益繁而我之邊備亦或廢弛修而舉之豈
容稍緩謹申明六事乞 勅該部詳議舉行等因叅
照所言合行擬議開具 一申明恩典照得雲南貴
州湖廣四川土官襲職定例具在天順八年三月初
八日欽奉 詔書之內應該本部行委三司御史

勘定例會奏行令就被冠帶襲職及有成化十三年三月初十日申明奏行事例照舊土官襲職六品以上者納穀一千五十石以備凶荒其間有洪武永樂年間各因撫安頑民或因從軍征進有功除授土官以後子孫爲因讐殺或以爭職等項停革止做把事冠帶舍人等項名目停革遠年者不許一槩納穀朦朧奏保承襲土官照舊止襲把事冠帶舍人今孫仁奏稱松潘一帶安撫司長官司番人貧窮無力納米俱不承襲私自冠帶止將印信相傳掌管要行撫按審勘應襲明白候其奏請奉明文就彼冠帶管事一節上以尊崇國體下以俯就夷情深得制馭之策

但恐前項土官中間多有因事停革年遠不該承襲之數合無行令本官會同鎮守副叅巡按三司等官將前項未曾襲職私自冠帶土官通行查勘不咎已往之罪分豁某人該襲把事某人該襲冠帶舍人無力納米某人因爲某事停革年遠不該承襲各具不扶保結繳報定名會奏另作施行 一選練官軍四川松潘茂州威州一帶衛所及東南二路關堡能知地利險夷賊情虛實武藝精熟官軍止合分爲二等頭等專事攻戰次等專備防守務令兵將相識不許私自替代敢有故違即于戶口年貌籍貫冊內查驗是實治以重罪勿事姑息其鎮守巡撫副叅等官

來提督征操躬親比較明示賞罰等事悉照所擬
行一鎮守往來孫仁要將副總兵堯或叅將傅泰
務要照舊互相往來巡視駐劄傅泰一巡直至松城
堯或一巡直至茂州若有不遵聽鎮守巡按官叅究
則官軍知畏邊備修舉況各官往來隨從并各關堡
官軍動以千數百計若將爲惡暴賊掩其不備出其
不意相機設策以攻勦之一節悉如所擬行但副叅
分守地界內關堡墩臺橋梁道路等項照舊各自督
令所部修理不致紊亂分守成命抑且得以顧藉所
守職業其餘往來耀武揚威設策馭夷等事不許互
分彼此務須一體責成庶幾往來不爲虛應故事

一提督巡視孫仁所言松潘南路歸化鎮平疊溪長
寧東路三舍關堡尤爲總要此先各設提督都指揮
一員各帶官軍三百員名在彼駐劄各照地方往來
巡視遇有番賊出沒就彼追捕截殺及護送糧運其
法甚良近年以來不知添設之由各帶家小經年累
月止在各該關堡或私役賣放不過行文虛應故事
視賊縱橫若無干涉但每一員常年巡視不帶家小
人情弗堪要行鎮守巡撫官公同差委堪任提督都
指揮千百戶每處二員共十員分爲兩班一年一換
各照原定地方提督往來巡視遇有番賊出沒就他
親率巡視守備官員相機追捕截殺不許仍前將

家小關堡住坐一節悉如所擬選委都指揮指揮下
員分爲兩班各帶官軍往來巡視一年一換若聽委
間有指揮聽以都指揮體統行事所部指揮敢有輕
忽怠事者卽爲依法治之不必選委千戶致難壓服
人心 一密行間諜孫仁所言各番巢寨悉在高崖
深箐地險人強若欲攻之無如行間若多擇能說番
語諳曉番情乖覺之人以爲通事或令其往彼調寨
或覘其來我關堡醉之以酒飽之以食賂之以金銀
布帛以投其好以誘其心向此寨則曰某寨番牌欲
某官軍來將汝殺向彼寨則曰某寨番牌欲某官軍
來將汝打俾之自相猜疑互生讐隙然後欲攻此則